




## Construccion di Parke Curazon pa Deporte na Jaburibari den su fase final

ORANJESTAD (AAN): E bario di Jaburibari, un poco mas cu tres aña y pico atras, ainda tabata ser afecta pa problemanan di un dump ilegal, caretera den mal estado y un container di sushi mal maneha cu tabata un molestia pa henter e bario. Awor, tur hende cu ta tramita riba e caminda di Jaburibari entre Paradera y Calabas, ta nota cambionan visibel cu a tuma lugar durante Gabinete Oduber III. E dump ta supervisa y limita, ta drechando e camindanan y e cambio mas bisto ta e transformacion di un area unda tabata tin sushedad convirtiendo esaki den un parke multifuncional recreativo/deportivo cu tur facilidad.

Mas recientemente a instala e speeltoestel, como tambe e monumento Reconoce Bo Bario Jaburibari, na e centro recreacional deportivo multifuncional aki. Ademas di esakinan por mira e veld di baby futbol, e gymzaal pa deportenan di sala, y siguramente ya caba por mira e circuito pa cana y core, di no menos di 1600 meter di distancia, unda cada

distancia riba e circuito aki lo tin tambe lugarnan special pa haci ehersicio aerobico, manera sit up y pull up, ta hayando forma. E diseño a tuma na cuenta mas tanto di e paisahe natural na cuenta y ta pasa mei mei di nos matanan local, haciendo asina un ambiente ameno y sano pa cana aden.

Tambe publico por wak caba, unda pa e hubentud, y deportistanan extremo, ya caba a cuminsa basha cement na e area pa skateboard y rollerblade cual lo tin un superficie special pa e deporte hoben aki. Detaye pa atencion ta haci un diferencia, unda e facilidadnan ta inclui lockersnan special pa asina esnan cu ta traha tambe por trankilamente cambia paña y baña prome of despues di uza e facilidadnan aki.

E concepto introduci pa Ministerio di Deporte y Minister Ramon Lee conhuntamente cu Lotto pa deporte, esta di centronan multifuncional recreativo deportivo unda henter famia por haya un of otro actividad, lo ta un atraccion pa grandi y chikito rond Aruba.